

kritikal sa iyang kaugalingon, nganong kanunay siya nga istrikto kaayo sa iyang kaugalingon sa pinakagamay nga mga butang. Ang iyang tubag ka-sagaran nga ehemplo sa usa ka tawo nga naminaw sa sayop nga tingog sa dihang siya mitubag, “Aron walay makauna og buhat niini kanako.”

Mga kaigsoonan, ang akong tambag niini nga sister nga misyonaryo mao ang akong tambag kaninyo: ilha ug atubanga ang inyong mga kahuyang, apan ayaw kapakyas sa paglihok tungod niini, tungod kay pipila niini mahimong inyong kauban hangtud nga kamo mobiya niining yutan-ong kinabuhi. Bisan unsa ang inyong kahimtang karon, sa higayon gayud nga kamo boluntaryong mopili sa matinuoron, malipayon, inadlaw-adlaw nga paghinulsol pinaagi sa pagpaningkamot nga yanong mobuhat ug mamahimong inyong labing maayo, ang Pag-ula sa Manluluwas, sa ingon niini, moputos ug mosunod kaninyo bisan asa kamo moadto. Sa pagpuyo niini nga paagi, kamo sa tinud-anay “kanunay magbaton sa kapasayloan sa inyong mga sala” (Mosiah 4:12) matag oras sa matag adlaw, matag segundo sa matag minuto, ug sa ingon hingpit nga malimpyo ug madawat sa atubangan sa Dios *sa tanan nga panahon*.

Inyoha ang pribilehiyo, kon gusto ninyo, nga masayud mismo, karon o sa dili madugay, nga kamo nakapahimuot sa Dios bisan pa sa inyong mga kasaypanan. Ako mopamatuod sa usa ka mahigugmaon nga Manluluwas kinsa naglaum kanato nga mosunod sa mga sugo. Ako mopamatuod sa usa ka mahigugmaon nga Manluluwas kinsa matinguhaon kaayo sa paghatag sa Iyang grasya ug kalooy. Ako mopamatuod sa usa ka mahigugmaon nga Manluluwas kinsa magmaya kon atong gamiton ang Iyang Pag-ula sa matag adlaw uban sa malinawon ug malipayon nga kasiguroan nga kita nag-atubang sa saktong direksyon. Ako mopamatuod sa usa ka mahigugmaon nga Manluluwas kinsa matinguhaon nga ang [inyong] “pagsalig mosamot pagkalig-on diha sa atubangan sa Dios (D&P 121:45). Sa pangalan ni Jesukristo, amen. ■



**Ni Elder Eduardo Gavarret**  
Sa Seventy

## Oo, Ginoo, Mosunod Ako Kanimo

*Midapit kanato ang Ginoo gamit ang lain-laing mga verb: “Umari kanako,” “Sumunod ka kanako,” “Lakaw uban kanako.” Sa matag situasyon usa kini ka pagdapit sa paglihok.*

“**K**ay tan-awa ang Ginoo mitugot ngadto sa tanan nga mga kanasuran, sa ilang kaugalingon nga nasud ug pinulongan, sa pagtudlo sa iyang pulong, oo, diha sa kaalam.”<sup>1</sup> Karon natuman na usab kini nga kasulatan gumikan niining oportunidad nga mapahayag ang akong mga pagbati gamit ang akong pinulongan.

Tuig 1975 kado, ug nagmision ko sa Uruguay Paraguay Mission isip batan-ong misyonaryo. Sa unang bulan nako sa mision, ang mga zone leader mihimo og kalihokan sa pagpakita og usa ka baruganan sa ebanghelyo. Ang matag misyonaryo sa zone gipangtaptapan ang mata, ug giingnan nga palakton kami padulong sa cultural hall. Kinahanglan kaming mosunod sa tingog sa usa ka lider, tingog nga among nadungog sa wala pa kami mosugod og lakaw. Hinoon, gipasidan-an mi nga atol sa paglakaw, makadungog mi og pipila ka mga tingog nga mosulay sa paglibug namo aron masaag kami.

Human sa mga minutos nga kalangas, pag-istoryahay, ug—tungatunga niining tanan—dunay tingog nga miingon, “Sunda ko,” masaligon

ko nga ako nagsunod sa eksakto nga tingog. Sa dihang nangabut mi sa cultural hall sa chapel, gipatangtang ang among taptap. Sa pagbuhat nako sa ingon, akong nakita nga dunay duha ka grupo ug naa ko sa grupo nga misunod sa sayop nga tingog. “Ingon og mao gayud ang tingog,” nakaingon ko.

Kadtong kasinatian 39 ka tuig nang milabay may mahangturong epekto kanako. Miingon ko, “Dili na gayud ko mosunod sa sayop nga tingog.” Dayon miingon ko, “Oo, Ginoo, Mosunod Ako Kanimo.”

Gusto nakong i-asoy kining kasinatian uban sa maaghup nga pagdapit kanato sa Manluluwas:

“Ako mao ang maayong magbalantay sa mga karnero. Ako nakaila sa mga ako. . . .

“Ang akong mga karnero nagapatalinghug sa akong tingog, ug ako nakaila kanila, ug sila nagasunod kanako.”<sup>2</sup>

Ang pagdapit sa “pagsunod Kaniya” pinakayano, direkta, ug impluwensyal nga pagdapit nga atong madawat. Gikan kini sa tin-aw nga tingog nga dili makalibug.



Midapit kanato ang Ginoo gamit ang lain-laing mga verb: “Umari kanako,” “Sumunod ka kanako,” “Lakaw uban kanako.” Ang matag pagdapit dili luma-labay; pagdapit kini sa paglihok. Para kini sa tanang katawhan gikan sa tawo nga mao ang Propeta sa mga propeta, Magtutudlo sa mga magtutudlo, ang Anak sa Dios, ang Mesiyas.

### Ang Pagdapit nga “Umari Kanako”

“Umari kanako, kamong tanan nga nabudlay ug nabug-atan, ug papahulayon ko kamo.”<sup>3</sup>

Kamong dili pa mga miyembro sa Simbahan makadawat niining pagdapit pinaagi sa mga misyonaryo sa mga pulong nga, “Mobasa ka ba sa Basahon ni Mormon? Mag-ampo ka ba? Mosimba ka ba? Imo bang sundon ang ehemplo ni Jesukristo ug magpabunyang niadtong dunay katungod?”<sup>4</sup> Unsaon ninyo pagtubag kini nga pagdapit karon?<sup>5</sup>

Modapit ko kaninyo sa pagpaminaw ug pagdawat sa mensahe pinaagi sa pag-ingon, “Oo, Ginoo, mosunod ako Kanimo!”

Si Carlos Badiola ug ang iyang pamilya, sa Minas, Uruguay, nakigtambo sa mga misyonaryo. Tungod kay ang mga elder daghan og mga pangutana atol sa mga leksyon, mihukom sila nga modapit og dili miyembro nga silingan—usa ka matahum nga 14 anyos nga si Norma—aron motabang nila og tubag. Si Norma usa ka kugihan nga estudyante sa high school kinsa nagtuon og Biblia sa eskwelahan nianang tuiga.

mao nga dihang nangutana ang mga misyonaryo, si Norma ang mitubag. Usa siya ka “golden investigator.” Ang leksyon nianang adlaw mahitungod sa Pulong sa Kaalam.

Dihang miuli siya sa balay human sa leksyon sa mga misyonaryo, nahibalo na si Norma kon unsay buhaton. Giingnan niya ang iyang mama, “Ma, sugod karon, wala nay kape nga ginatasan para nako. Gatas na lang.” Kadto usa ka klarong pagpakita sa iyang tinguha nga modawat sa pagdapit nga mosunod kang Kristo, nga gihimo sa mga misyonaryo.

Si Carlos Badiola ug si Norma nabunyagan. Wala madugay, tungod sa ehemplo ni Norma, ang iyang mama, papa, ug mga igsoon nabunyagan usab. Si Norma ug ako dungan nga nagtubo nianang gamay apan impluwensyal nga branch. Wala madugay, sa pag-uli nako gikan sa misyon, nagminyo mi. Nasayud ko nga mas sayon ang pagsunod sa Manluluwas nga kauban siya sa akong kiliran.

Ang tawo nga miyembro sa Simbahan ug midawat niini nga pagdapit mobag-o sa pasalig matag semana pinaagi sa pag-ambit sa sakrament.<sup>6</sup> Usa ka bahin niana nga pasalig naglakip sa pagtuman sa mga sugo; sa paghimo sa ingon kamo magaingon, “Oo, Ginoo, mosunod ako Kanimo!”<sup>7</sup>

### Ang Pagdapit nga “Sumunod Ka Kanako”

Ang “Sumunod ka kanako,” mao ang pagdapit sa Ginoo sa adunahan

nga batan-ong magmamando. Ang tawong adunahan nagtuman sa mga sugo sa tibuok niyang kinabuhi. Dihang nangutana siya unsa pay iyang mahimo, nakadawat siya og tubag uban sa klarong pagdapit: “Umanhi ka, . . . sumunod ka kanako.”<sup>8</sup> Hi-noon, bisan og yano ang pagdapit, dili kini mahimo kon walay sakripisyo. Nagkinahanglan kini og paningkamot—inubanan sa desisyon ug buhat.

Si propeta Nephi midapit og kaugalingong pagpamalandong sa dihang nangutana siya: “Ug si [Jesus] miingon ngadto sa mga katawhan: Sunod kamo kanako. Busa, akong hinigugma nga mga kaigsoonan, makasunod ba kita kang Jesus gawas kon kita andam sa paghupot sa mga sugo sa Amahan?”<sup>9</sup>

Ang pagdapit nga “umari kanako,” aron maminaw sa Iyang tingog, ug motuman niini maoy mensahe sa mga misyonaryo gikan sa sinugdanan, nagtabang sa daghan nga mausab gayud ang ilang kinabuhi.

Singkwenta ka tuig nang milabay ang mga misyonaryo misulod sa ayuhanan sa relo sa akong papa aron magbilin og relo nga ipaayo. Sama sa maayong mga misyonaryo, gipahimuslan nila ang oportunidad nga makigsulti sa akong papa ug mama bahin sa ebanghelyo. Gidawat sa akong papa ang mga misyonaryo, ug gidawat ni mama ang mensahe ug ang pagdapit nga mosunod kang Kristo. Sukad ni adto hangtud karon, nagpabilin siyang aktibo sa Simbahan. Miingon siya, “Oo, Ginoo, mosunod ako Kanimo.”

Kon maningkamot kamo sa pagduol Kaniya, makabaton kamo og gahum sa pagpagaan sa mga palas-anon sa kinabuhi, ma-pisikal o espiritwal, *ug makasinati og positibong kausaban nga makatabang ninyo nga mas malipayon.*

### Ang Pagdapit sa “Paglakaw uban Kanako”

Si Enoch gipasangyaw sa ebanghelyo ngadto sa lisud, tig-a og kasingasing nga mga tawo. Wala siya mobati nga angayan. May mga pagduha-duha siya kon mahimo ba niya kini. Gihupay sa Ginoo ang iyang mga pagduha-duha ug gilig-on ang

iyang pagtuo pinaagi sa pagdapit nga “Lakaw uban kanako”—pagdapit nga, sama sa sungkod sa tawo nga buta o bukton sa usa ka higala, makagiya sa tawo kansang lakang dili sigurado. Pinaagi sa paggunit sa bukton sa Manluluwas ug paglakaw uban Kaniya, nakita ni Enoch nga nalog-on ang iyang lakang ug nahimo siyang talagsaong misyonaryo ug propeta.<sup>10</sup>

Ang desisyon nga “umari kanako” ug “sumunod ka kanako” personal. Kon dawaton nato kining pagdapit, ang atong lebel sa pasalig motaas, ug niana kita maka-“lakaw uban Kaniya.” Kini nga lebel makaugmad og mas suod nga relasyon uban sa Manluluwas—ang bunga sa atong pagdawat sa unang pagdapit.

Si Norma ug ako tinagsa nga midawat sa pagdapit nga “umari kanako” ug sa “sumunod ka kanako.” Dayon, kami, nga nagtinabangay sa usag usa, nakakat-on sa paglakaw uban Kaniya.

Ang paningkamot ug determinasyon sa pagpangita Kaniya ug pagsunod Kaniya gantihan sa gikinahanglan nato nga mga panalangin.

Mao kana ang sitwasyon sa babaye kinsa, sa dakong paningkamot, nahikap ang saput sa Manluluwas<sup>11</sup> o sama kang Bartimeo ang tawo nga buta, kansang determinasyon maoy yawe sa milagro sa iyang kinabuhi.<sup>12</sup> Niining duha ka mga sitwasyon ang pagkaayo sa lawas ug espiritu nahatag.

Ikab-ot ang inyong kamot, hikapa ang Iyang saput, dawata ang Iyang

pagdapit, nga moingon, “Oo, Ginoo, mosunod ako Kanimo!”—ug molakaw uban Kaniya.

Ang “Umari kanako,” “Sumunod ka kanako,” ug “Lakaw uban kanako” mga pagdapit nga dunay natural nga gahum—niadtong modawat niini—sa pag-usab sa inyong kinabuhi ug makahimo og *kausaban diha kaninyo* diin kamo moingon, “[Ako] wala nay hilig sa pagbuhat og dautan, apan sa pagbuhat og maayo sa kanunay.”<sup>13</sup>

Isip dayag nga pagpakita niana nga kausaban, inyong bation ang dakong tinguha sa “[pagtabang sa maluyahon, ipataas ang kamot sa nawad-an og paglaum, lig-una ang mga tuhod nga mahuyang.”<sup>14</sup>

Unsang mga lakang ang atong buhaton karon sa “paglakaw uban Kaniya”?

1. *Pun-i ang tinguha* nga mahimong mas maayong sumusunod ni Kristo.<sup>15</sup>
2. *Pangamuyo* alang sa tinguha aron ang inyong pagtuo diha Kaniya motubo.<sup>16</sup>
3. *Angkuna ang kahibalo* gikan sa mga kasulatan, magdan-ag sa agianan ug lig-unon ang inyong tinguha nga mag-usab.<sup>17</sup>
4. *Desisyuni karon* ang pagbuhat ug pag-ingon, “Oo, Ginoo, mosunod ako Kanimo!” Ang pagkahibalo lang sa kamatuoran dili makausab sa inyong kalibutan gawas kon ang

kahibalo inyong usbon ngadto sa *buhat*.<sup>18</sup>

5. *Ipadayon* ang desisyon nga inyong gihimo pinaagi sa paggamit niining mga baruganan matag adlaw.<sup>19</sup>

Hinaut nga ang mga pulong sa pinalangga natong propeta, si Presidente Thomas S. Monson, makadasig nato sa pagbuhat diha sa atong tinguha nga modawat sa pagdapit sa Manluluwas. Si Presidente Monson miingon: “Kinsa kining Hari sa himaya, kining Ginoo sa mga panon? Siya ang atong Agalon. Siya ang atong Manluluwas. Siya ang Anak sa Dios. Siya ang Tigpasiugda sa atong Kaluwasan. Nangamay Siya, ‘Sumunod ka kanako.’ Misugo Siya, ‘Lakaw, ug buhata ang ingon.’ Mihangyo siya, ‘Tumana ang akong mga sugo.’”<sup>20</sup>

Hinaut nga modesisyon kita sa pagpataas sa lebel sa atong pagsimba ug pasalig sa Dios, ug unta ang atong pagsanong sa Iyang pagdapit lanog ug tin-aw nga madungog: “Oo, Ginoo, mosunod ako Kanimo!”<sup>21</sup> Sa sagra-dong pangalan ni Ginoong Jesukristo, amen. ■

#### MUBO NGA MGA SULAT

1. Alma 29:8.
2. Juan 10:14, 27.
3. Mateo 11:28; tan-awa usab sa Isaias 55:3.
4. Tan-awa sa *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 47, 237–246.
5. Tan-awa sa Mga Buhat 2:37–38.
6. Tan-awa sa Doktrina ug mga Pakigsaad 20:37, 77–79.
7. Tan-awa sa Doktrina ug mga Pakigsaad 42:29.
8. Marcos 10:21.
9. 2 Nephi 31:10.
10. Tan-awa sa Moises 6:33–35.
11. Tan-awa sa Lucas 8:43–48.
12. Tan-awa sa Marcos 10:46–52.
13. Mosiah 5:2.
14. Doktrina ug mga Pakigsaad 81:5; tan-awa usab sa Isaias 35:3.
15. Tan-awa sa Alma 22:15–16; Dallin H. Oaks, “Tinguha,” *Liahona*, Mayo 2011, 42–45.
16. Tan-awa sa Alma 34:17–27; 37:37.
17. Tan-awa sa Salmo 119:105; Helaman 3:29.
18. Tan-awa sa Mosiah 5:5.
19. Si Ralph Waldo Emerson miingon, “Ang butang nga kanunay natong gibuhat mas magkasayon nga buhaton, dili ang buhatunon maoy nausab apan ang atong katakus sa paghimo ang milambo” (sa Heber J. Grant, *Gospel Standards*, comp. G. Homer Durham [1941], 355).
20. Thomas S. Monson, “Pagpangita og Kalipay Panahon sa Panaw,” *Liahona*, Nob. 2008, 88.
21. Tan-awa sa “Lord, I Would Follow Thee,” *Hymns*, nu. 220.



Bariloche, Argentina